

Transkription von Urkunde HBS 1488a

Ort, Datierung: Halberstadt, 1488-01-13

Signatur: Stadtarchiv Braunschweig, A I 1: 899

We Ba[l]tasar domprouest Johann dekenn Vnnd gantze Cappittel der kercken tho halberstadt Bokennen openbar in dussem breue / vor vnnsz vnnsze nakomelinge vnnd alsweme so de dogentsame fruwe grete harmen Ameren selliger nagelaten weddewe / borgersche tho honouier lüdeleff or son vnnd ander ore kindere vnnd forder ore rechten eruen den dath tholangen mach vnnsz / vorgenanten domprouest Deken vnnd Cappittel ouenberorth myt dren hundert gulden von twolleff hunderth Rinschen gulde(n) / houethstols dar mede her ludeleff Amere selliger ichteswanne dem godt gnade bij vnnsz dem Cappittell achte vnndvertich gulden Jar-/liker Renthe up eynen wedderkop vorkofft hadden gans vorlaten vnnd losz gesecht hebben . Vnnd forder vnnsz myt den obgena(n)ten / dren hunderth gulden houethgeldes myt twolleff gulden na antale der upgerorter achte vnnd fertich gulden alsze jarlikes tinszes / an den Erszamen Rath tho Brunswick im hagen geschulden vnnd gannsz gewiseth hefft , Des szo bokennen wij Baltasar / domprouest johan deken vnnd gantze Cappittel der kercken tho halberstadt ergedacht Dat wij vth krafft vnnd macht salker / vorwisinge mit vnnszer vorwillinge vnnd witschop geschen dem Erszamen Rade to Brunswick jmhagen eren nakomen / hebber dusses breues myt orem guden willen rechter witliker schult schuldich sin dre hunderth Rinsche gulden de we / obgerorder wisze in vnnszer kercken nūth vnnd fromen gekarth vnnd gutliken woluornogeth syn . Hir uor hebbe / we ohne vnnd oren middebenomeden rechtes vnnd redelikes kopes vorkofft vnnd vorkopen ehne Jegenwardich Jn vn(nde) / myt krafft dusses breues twolleff Rinsche gulden jarliker renthe de wij ohne schullen vnnd willen alle Jarlikes gutliken / geuen vnnd entrichten vth alle vnnszer kercken redesten guderen vth vnnszem Reuenther up de hilgen dage tho wy(n)achten / vnbehinderth alles geistlikes vnnd wartlikes gerichtes , Dath hebbe we vnnsz vnnszen nakomen den willen vnnd macht / bohalden Dath wij alszodan(ne) twolleff gulden jarliker Renthe vom Erszamen Rade Jm(m)hagen vnnd oren medebenanten alle / Jarlikes mogen wedderkopen vnnd welkes jares wij dath don willen szo schulle we ohne de losze uppe sūnte Michaelisz / dach touoren uorkündigen . vnnd ohne denne dar nha in dem twolleff dagen tho wynnachten ore drehundert gulden / houethgeldes myt vorschulden tinsze vnnd effte des wes vorseten were weddergeuen vnnd entrichten sunder geuerde / ok vnuorhinderth alsz gerichtes geistlikes vnnd wartlikes vnnd szo deme so ghescheyn were schall dussze breff machtlosz sin / alle dusse vorgeschreuen artikell vnnd pūcte dusses breues loue we bartasar domprouest Johan deken vnnd gantze / Cappittel vor vnnsz vnnd vnnsze nakomen dem Erszamen Rade tho Brūnswick vnnd oren medebenomeden Stede vnnd / vast vnuorbroken sunder geuerde wol tho haldende vnnd hebben des tho orkunde vnnd fullerkomen bewisinge vnnszes / Cappittels grote Jngeszegell witliken heten hengen beneden an dussen breff Geuen na der borth (cristi) vnnszes leuen heren dusenth / veirhunder dar nha jndem achte vnndachtigsten Jare des Sondages nha der hilger driger konige dage